

**KERATAN AKHBAR-AKHBAR TEMPATAN
TARIKH: 10 JANUARI 2016 (AHAD)**

Bil	Tajuk	Akhbar
1.	Hujan dijangka berkurang sebanyak 20 hingga 60%	Mingguan Malaysia
2.	Fenomena EL Nino 'kuat' ekoran hujan kurang di Malaysia	BERNAMA
3.	Nekad terpaksa import ikan akibat cuaca panas	BERNAMA

KERATAN AKHBAR
MINGGUAN MALAYSIA (DALAM NEGERI) : MUKA SURAT 05
TARIKH: 10 JANUARI 2016 (AHAD)

Hujan dijangka berkurang sebanyak 20 hingga 60%

KUALA LUMPUR 9 Jan. - Taburan hujan di negara ini dijangka berkurangan sebanyak 20 hingga 60 peratus bermula bulan ini berikutan fenomena El Nino yang sedang melanda.

Ketua Pengarah Jabatan Meteorologi, Datuk Che Gayah Ismail berkata, keadaan El Nino ketika ini dikategorikan sebagai 'kuat' dengan suhu yang dijangka meningkat antara 0.5 hingga 2 darjah Celcius.

"Kesan El Nino 'kuat' ini akan berlanjutan sehingga April dan negeri-negeri di utara Semenanjung telah mula menerima kesannya manakala menjelang hujung Januari, impak El Nino kuat akan turut dirasai semua negeri di Semenanjung, Sabah serta Bahagian Miri dan Limbang di Sarawak.



CHE GAYAH

"Suhu maksimum akibat El Nino di negara ini ialah 40.1 darjah Celcius pada tahun 1998. Oleh itu pihak kami tidak menolak kemungkinan situasi yang sama bakal berulang," katanya ketika dihubungi di sini hari ini.

El Nino adalah fenomena pemanasan suhu permukaan laut yang berlaku dalam tempoh enam bulan berturut-turut setiap dua hingga empat tahun di timur Lautan Pasifik.

Fenomena itu boleh menyebabkan rangkaian perubahan iklim berlaku di seluruh dunia dan antara kesannya ialah hujan lebat di setengah kawasan manakala di kawasan lain, berlaku kemarau berpanjangan.

Dalam pada itu, Che Gayah berkata fenomena El Nino dijangka mencapai kemuncak pada bulan ini dan akan beransur lemah mulai Februari.

"Keadaan dijangka menjadi normal selepas bulan Jun 2016," katanya.



Fenomena El Nino 'Kuat' Ekoran Hujan Kurang Di Malaysia

KUALA LUMPUR, 9 Jan (Bernama) -- Intensiti hujan negara dijangka berkurangan antara 20 hingga 60 peratus bermula bulan ini, ekoran fenomena El Nino sedang melanda Malaysia pada masa ini.

Ketua Pengarah Jabatan Meteorologi Datuk Che Gayah Ismail berkata tahap El Nino kini dikategorikan sebagai 'kuat' dan dijangka suhu negara meningkat antara 0.5 dan 2 darjah celsius.

Beliau berkata impak El Nino yang kuat itu akan berterusan sehingga April dengan negeri-negeri di utara Semenanjung sudah mula menerima kesan fenomena itu.

Impak El Nino kuat ini akan turut dirasai semua negeri di Semenanjung, Sabah serta Bahagian Miri dan Limbang di Sarawak menjelang hujung bulan ini, katanya ketika dihubungi Bernama hari ini.

"Kalau kita lihat rekod, suhu maksimum negara semasa dilanda El Nino pernah mencecah 40.1 celsius pada 1998.

"Oleh itu pihak kami tidak menolak kemungkinan situasi yang sama bakal berulang," katanya.

El Nino adalah fenomena pemanasan suhu permukaan laut yang berlaku dalam tempoh enam bulan berturut-turut setiap dua hingga empat tahun di timur Lautan Pasifik.

Ia boleh menyebabkan rantaian perubahan iklim berlaku di seluruh dunia dan antara kesannya ialah hujan lebat di sesetengah kawasan, sementara di kawasan lain, berlaku kemarau berpanjangan.

Pertubuhan Bangsa Bersatu (PBB) mengeluarkan kenyataan pada Disember 2014 menyatakan fenomena El Nino yang sedang melanda seluruh dunia, yang bermula sederhana dan setempat di Pasifik pada akhir 2015, kini meningkat meliputi sebahagian besar Asia dan Pasifik.

Fenomena itu juga mendatangkan kesan besar seperti di tengah dan selatan India, tengah dan timur laut Thailand, tengah dan selatan Filipina, utara Kemboja, timur Indonesia, Papua New Guinea dan kebanyakan negara kepulauan Pasifik.

Dalam pada itu, Che Gayah berkata intensiti fenomena El Nino dijangka mencapai kemuncak pada bulan ini, dan seterusnya beransur lemah mulai Februari, dan keadaan dijangka menjadi neutral selepas Jun 2016.



Nekad Terpaksa Import Ikan Akibat Cuaca Panas

ALOR SETAR, 10 Jan (Bernama) -- Persatuan Nelayan Negeri Kedah (Nekad) terpaksa mengambil langkah mengimport kira-kira 10 tan hasil laut sejuk beku bagi menampung kekurangan bekalan akibat cuaca panas akhir-akhir ini.

Pengerusi Nekad Ahmad Rudin Hussin berkata langkah itu terpaksa diambil memandangkan hasil tangkapan yang semakin merosot sehingga 50 peratus akibat keadaan cuaca pada masa ini.

Beliau berkata, keputusan untuk mengimport hasil laut itu adalah hasil mesyuarat persatuan berkenaan semalam dan dijangka akan dimulakan dalam akhir bulan ini, sekiranya keadaan cuaca panas masih berterusan.

Bagaimanapun beliau berkata, pihaknya terpaksa memilih untuk mengimport hasil laut daripada negara-negara yang mempunyai nilai mata wang yang rendah seperti India, Bangladesh, Indonesia memandangkan nilai ringgit Malaysia yang agak merosot.

Bekalan hasil laut yang meliputi ikan selar, selayang, sardin, bawal, udang serta dijangka mampu memenuhi keperluan dalam tempoh Februari hingga Mac ini, bergantung kepada keadaan cuaca, katanya.

Beliau berkata, keadaan cuaca panas dialami sekarang turut menyebabkan harga ikan melambung naik seperti ikan termenung yang naik daripada RM7 sekilogram kepada RM14 sekilogram.

"Apabila cuaca panas, air laut pun panas, maka ikan-ikan banyak lari ke tengah laut ingin mencari tempat sejuk, dan amatlah bahaya untuk para nelayan turun ke tengah laut dalam keadaan seperti ini," katanya kepada Bernama.

Sementara itu, [Pengarah Meteorologi Kedah Rosli Zakaria@Che Kob](#) berkata, fenomena El-Nino yang berlaku meningkatkan lagi cuaca panas dan kering yang di alami negeri-negeri utara Semenanjung ketika ini.

Katanya, bagi tempoh antara Disember hingga Mac, corak iklim di negeri-negeri utara sememangnya panas dan kering seperti kebiasaan.

Sehingga semalam, Stesen Meteorologi Alor Setar mencatatkan rekod tiada hujan selama tempoh hampir tiga minggu bermula 18 Dis lepas, dengan hanya sehari hujan pada 28 Dis.

Suhu pula dalam julat 23 hingga 34 darjah Celsius.

-- BERNAMA